

Casita Geel ta haya un destinacion nobo y lo ta conoci como 'Patio 15'



ORANJESTAD (AAN): E monumento na Weststraat 15 conoci den boca di pueblo manera: Casita Geel, Museo Numismático, Aruba Bank huisje of Arina, entrante awe lo conoce un destinacion nobo bao di e nomber Patio 15.

Esaki ta e cas geel cu tin net patras di Parada di Bus grandi na Playa. Riba Diabierna 3 di juli Stichting Monumentenfonds Aruba, durante e presentacion di e proyecto Patio 15, a

firma un acuerdo di huur cu Experitours cu entrante e fecha aki lo haci uzo di e casita Geel. Na final di 2019 despues cu e contract a caba cu e ultimo usuaronan SMFA a cuminsa cu e buskeda pa un hurdo nobo. Despues di a haya diferente interesadonan a duna nan e oportunidad pa entrega e propuesta di nan proyecto pa asina SMFA por a dicidi cual proyecto ta mas apto pa e edificio teniendo na cuenta entre

otro e status di monumento proteha. Na final a logra yega na un acuerdo cu Experitours cual lo tin un proyecto dirigi riba turista y localnan y cu ta haci cu e bishitantenan lo por admira e bunita monumento aki di paden tambe.

Den e proximo siman lo tin un destaho publico pa asina haci e adaptacionnan y trabounan di mantencion necesario.

Casita Geel ta un cas di cunucu construi na aña 1908 na crusada di Caya Betico Croes y Waterweg, pega cu e actual edificio di Aruba Bank. Probablemente e parti central di e cas a ser construi na 1860 pa un Frances y na 1908 a wordo cumpra pa Sr. Richard Johan Eman van der Biest. Kende tabata casa cu Catharina van der Biest-Oduber. Di e matri-



monio aki a nace seis yiu cual tur seis a lanta den e cas aki. Un di e yiunan Frederica van der Biest-Eman a casa cu John Gerard Eman, fundador di e prome instituto financiero di Aruba, Aruba Bank. For di aña 1999 e cas a keda inhabita y no a ser uza mas.

Na aña 2000 cu e meta pa preserva e casita aki pa futuro generacionnan y evita e bay perdi a dicidi pa muda esaki pa un locacion nobo na Weststraat. Pa aloca e edificio a busca un tereno den Oranjestad mes paso akinan ta caminda cu e cas di cunucu mester a keda mirando cu ta den e area aki so por a haya e tipo di casnan aki.

Un otro punto importante tabata cu mester a haya un tereno caminda por a aloca e cas mescos cu na su tereno original na un distancia di 14 meter for di e rooilijn esaki ta ser considera un locacion historico. Asina a logra yega na e tereno aki caminda e edificio ta actualmente

despues cu e tereno a keda traspasa pa Stichting Monumentenfonds Aruba. Esaki ta e unico biaha cu na Aruba a muda un monumento completamente.

SMFA ta desea Experitours hopi exito cu e proyecto di Patio 15. Hunto nos lo preserva nos historia pa futuro!